



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1397/09
Sarajevo, 12.5.2009. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 12.5.2009.			
Organizaciona jedinica	Klasifikaciona oznaka	Redni broj	Broj priloga
01-50-1-15-50/09			

PARLAMENTARNA SKUPŠTINA
BOSNE I HERCEGOVINE

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 86. sjednici održanoj 7.5.2009. godine, utvrdilo je Odgovor na zastupničko pitanje koje je Denis Bećirović, zastupnik u Zastupničkom domu Parlamentarne skupštine Bosne i Hercegovine, postavio na 50. sjednici ovog doma održanoj 1.4.2009. godine.

U pravitku dostavljamo Odgovor uz molbu da isti uručite zastupniku.

S poštovanjem,



GENERALNI TAJNIK
Zvonimir Kutleša



**BOSNA I HERCEGOVINA
VIJEĆE MINISTARA**

Broj: 05-50-1397/09
Sarajevo, 7.5.2009. godine

Denis Bećirović, zastupnik Predstavničkog doma Parlamentarne skupštine Bosne i Hercegovine, na 50. sjednici Predstavničkog doma, održanoj 01.04.2009.godine, postavio je slijedeće poslaničko pitanje:

«Molim ministra za ljudska prava da zajedno sa ministrom pravde, ako je to moguće, u narednih 15 dana sačine jednu cjelovitu informaciju o slučaju Ilije Jurišića»

Na postavljeno poslaničko pitanje, Vijeće ministara Bosne i Hercegovine, u smislu člana 37. Zakona o Vijeću ministara Bosne i Hercegovine («Službeni glasnik BiH», broj 38/02), na 86. sjednici, održanoj 7.5.2009. godine, utvrdilo je slijedeći

ODGOVOR

Ministarstvo pravde Bosne i Hercegovine je odmah po saznanju za lišenje slobode stupilo u kontakt sa nadležnim organima Republike Srbije u cilju izručenja gosp. Jurišića i ustupanja krivičnog gonjenja nadležnim pravosudnim organima Bosne i Hercegovine. U tom cilju Ministarstvo pravde Bosne i Hercegovine je od svih relevantnih organa i institucija zatražilo hitno prikupljanje cjelokupne ekstradicione dokumentacije, kako bi se kompletirala molba za izručenje gosp. Jurišića, kao i ustupanja krivičnog gonjenja nadležnim organima Bosne i Hercegovine.

Predmetna molba za izručenje, u kojoj je sadržan i alternativni zahtjev za ustupanje krivičnog gonjenja, prosljeđena je Ministarstvu pravde Republike Srbije dana 04.07.2007.godine.

Po otpremanju ove molbe, Ministarstvo pravde Bosne i Hercegovine je preduzimalo sve aktivnosti u skladu sa međunarodnim ugovorima i konvencijama koje obvezuju obje države, radi udovoljavanja zahtjevima iz podnesene molbe.

U Beogradu je dana 21.08.2007.godine održan sastanak ministara pravde Bosne i Hercegovine i Republike Srbije, na kojem je ministar pravde Bosne i Hercegovine iznio i obrazložio svoje stavove u vezi opravdanosti molbe za izručenje, te se osobno založio da zamoljena strana istoj udovolji.

Dana 07.09.2007.godine, ministar pravde Bosne i Hercegovine uputio je i protestno pismo – notu Ministarstvu pravde Republike Srbije, kojom je zatražio razjašnjenje ovog slučaja i naveo valjane razloge zbog kojih smatra da je molba za izručenje gosp. Jurišića osnovana, te zamolio povratnu informaciju u vezi sa ovim predmetom. Posebno je ukazao na kršenje Evropske konvencije o pravnoj pomoći u krivičnim stvarima, kao i Bilateralnog sporazuma od strane Okružnog suda u Beogradu, na način da su pozivani svjedoci iz Bosne i Hercegovine lično i uz prijetnju kažnjavanja u slučaju neodazivanja pozivu.

Od tada se odvijalo niz značajnih aktivnosti vezanih za slučaj Jurišić. Okružni sud u Beogradu – Vijeće za ratne zločine je u više navrata, putem Ministarstva pravde Bosne i Hercegovine, tražilo od nadležnih organa Bosne i Hercegovine saslušanje određenih svjedoka vezanih za ovaj slučaj, te je svaki put u dopisima Ministarstvu pravde Republike Srbije ukazano na obveze po pitanju podnesene molbe za izručenje gosp. Jurišića.

Među mnogobrojnim aktima upućenim Ministarstvu pravde Republike Srbije, a vezano za ovaj slučaj, posebno treba istaći akte Ministarstva pravde Bosne i Hercegovine – urgenciju od 31.07.2007.godine i 23.10.2007.godine, kojim je Ministarstvo pravde Republike Srbije ponovno ukazano na obveze preuzete međunarodnim ugovorima. Istovremeno se navedenim aktima urgiralo postupanje i dostavljanje odgovora po navedenoj molbi. Uz akte su davane i pismene elaboracije o opravdanosti naše molbe i iste nisu osporene od druge strane.

Dana 12.11.2007.godine ministru pravde Republike Srbije ponovno je, putem Ministarstva inozemnih poslova Bosne i Hercegovine, upućena Nota, u kojoj je ministar pravde Bosne i Hercegovine još jednom podsjetio vlasti Republike Srbije na obvezu izvršavanja međunarodnih ugovora.

Ministarstvo pravde Bosne i Hercegovine je i u toku 2008. godine nastavilo sa preduzimanjem aktivnosti u skladu sa međunarodnim ugovorima i konvencijama čiji je član Bosna i Hercegovina, a u cilju razrješenja slučaja Jurišić Ilija, odnosno nastojanja da se krivični postupak koji se protiv imenovanog vodi u Republici Srbiji ustupi pravosudnim organima Bosne i Hercegovine.

U okviru svih preduzetih aktivnosti, a u cilju razjašnjenja spornog pitanja, delegacija Parlamentarne skupštine Bosne i Hercegovine je, na vlastiti zahtjev, 17.januara 2008.godine posjetila gosp. Jurišića u Okružnom zatvoru u Beogradu. Članovi delegacije iskoristili su priliku da se sastanu i sa ministrom rada i socijalne politike u Vladi Republike Srbije, te predstavnicima pet odbora Narodne skupštine Republike Srbije, kako bi razgovarali o predmetnom slučaju, kao i pitanju poboljšanja odnosa između Bosne i Hercegovine i Republike Srbije.

Dana 18.01.2008.godine Ministarstvo pravde Bosne i Hercegovine je Ministarstvu pravde Republike Srbije prosljedilo zamolnicu Tužilaštva Bosne i Hercegovine za ustupanje krivičnog gonjenja gosp. Jurišića pravosudnim organima Bosne i Hercegovine.

Od Ministarstva pravde Republike Srbije je 30.05.2008. godine zaprimljen odgovor Okružnog suda u Beogradu-Vijeća za ratne zločine od 27.03.2008. godine, a kojim isto obavještava ovo Ministarstvo da nisu ispunjeni uslovi za ustupanje krivičnog gonjenja Ilije Jurišića Bosni i Hercegovini.

Dana 13.02.2008.godine Ministarstvo pravde Bosne i Hercegovine uputilo je Ministarstvu pravde Republike Srbije molbu za pokretanje konsultativne procedure u svrhu dogovora zainteresiranih strana za rješavanje spornog pitanja i donošenja zajedničke odluke o tome koja država će nastaviti vođenje krivičnog postupka.

Od Ministarstva pravde Republike Srbije je 13.05.2008. godine zaprimljen akt od 30.04.2008. godine kojim je odbijena molba Ministarstva pravde Bosne i Hercegovine od 13.02.2008. godine i potvrđen stav Okružnog suda u Beogradu-Vijeća za ratne zločine da nisu ispunjeni uslovi za prenos postupka.

Nakon što su od Ministarstva pravde Republike Srbije zaprimljeni negativni odgovori po molbi za ekstradiciju navedenog lica, kao i po molbi za ustupanje krivičnog gonjenja nadležnim organima Bosne i Hercegovine, dana 01.07.2008. godine Ministarstvo pravde Bosne i Hercegovine se obratilo Ministarstvu pravde Republike Srbije sa molbom za izjašnjenje pravosudnih organa Republike Srbije da li bi imenovanom bilo omogućeno da se brani sa slobode u slučaju da nadležni pravosudni organi u Bosni i Hercegovini daju garancije da će Ilija Jurišić biti u svakom trenutku dostupan pravosudnim organima Republike Srbije.

Od Ministarstva pravde Republike Srbije dana 26.08.2008. godine obaviješteni smo da je ova zamolnica-upit samo proslijeđena Okružnom sudu u Beogradu-Vijeću za ratne zločine, odgovor na navedenu zamolnicu i pored više naših urgencija nije nam stigao.

Dana 23.06.2008. godine Ministarstvo pravde Bosne i Hercegovine je obavijestilo Vijeće Evrope-Evropski komitet za krivične probleme (CDPC) o problemima između Bosne i Hercegovine i Republike Srbije u provođenju Evropske konvencije o prenošenju postupaka u krivičnim stvarima i predložilo razrješenje istih u predmetu Ilija Jurišić.

U povodu tog prijedloga Ministarstvo pravde Bosne i Hercegovine je 04.09.2008. godine zaprimilo prijedlog predsjedavajućeg Evropskog komiteta za krivične probleme (CDPC) za održavanje sastanka predstavnika Bosne i Hercegovine i Republike Srbije u svrhu „ prijateljskog rješenja problema“ u skladu sa odredbama Evropske konvencije o prenošenju postupaka u krivičnim stvarima.

Predsjedavajući CDPC-a je predložio termin održavanja sastanka predstavnika Bosne i Hercegovine i Republike Srbije za 23.10.2008. godine u Strasbourgu.

Sa naše strane je prihvaćen predloženi termin i određeno da Bosnu i Hercegovinu na ovom sastanku zastupa predstavnik Ministarstva pravde Bosne i Hercegovine, koji je upućen u postupak pružanja međunarodne pravne pomoći i predstavnik Tužilaštva Bosne i Hercegovine, koje vodi predmetni postupak.

Do navedenog sastanka nije došlo zbog toga što su predstavnici Republike Srbije odbili da prisustvuju istom.

Bez prisustva predstavnika Republike Srbije problem se nije mogao riješiti, niti je Evropski komitet za krivične probleme (CDPC) preduzimao dalje radnje za razrješenje ovog slučaja, obzirom da on u skladu sa odredbama Evropske konvencije o prenošenju postupaka u krivičnim stvarima nema mogućnost nametanja rješenja, već samo postupa u cilju iznalaženja prijateljskog rješenja problema.

Dana 19.03.2009. godine obaviješteni smo od Ministarstva vanjskih poslova Bosne i Hercegovine da je 14.03.2009. godine gospođa Amira Arifović-Harms otpravnica poslova Ambasade Bosne i Hercegovine u Beogradu održala sastanak u vezi slučaja Ilije Jurišića sa Vladimirom Vukčevićem, glavnim tužiocem za ratne zločine Republike Srbije i Milanom Petrovićem, zamjenikom glavnog tužioca, koji je direktno zadužen za sve predmete koji se tiču Bosne i Hercegovine.

Prema informacijama zamjenika glavnog tužioca gospodina Petrovića iznijetim na sastanku suđenje Iliji Jurišiću trebalo bi da se okonča do kraja maja , eventualno do sredine juna ove godine.

Glavni tužilac gospodin Vukčević je na tom sastanku obavijestio da je saglasan, da ukoliko presuda bude osuđujuća, Jurišić Ilija izdržava kaznu u Bosni i Hercegovini.

Ministarstvo pravde Bosne i Hercegovine postupa urgentno po svim zamolnicama u vezi ovog slučaja, tako da su putem ovog Ministarstva dostavljene mnoge izjave svjedoka, kako bi se postupak što prije okončao.

Dakle, Ministarstvo pravde Bosne i Hercegovine i ministar pravde Bosne i Hercegovine, preduzimali su i preduzimaće i dalje sve aktivnosti iz svoje nadležnosti u skladu sa zakonima Bosne i Hercegovine i međunarodnim ugovorima, a sve u cilju razrješenja predmetnog slučaja.

NAPOMENA:

Usmeni odgovor na postavljeno pitanje poslanika Denisa Bećirovića sa 50. sjednice Predstavničkog doma PSBiH. (Izvod iz stenograma.)

SAFET HALILOVIĆ:

Uvaženi predsjedavajući, poštovani zastupnici, poštovani gosti, što se tiče ovog pitanja vezanog za gospodina Jurišića, ono dugo već traje u neželjenim, tako da kažem, okvirima, na neželjeni način. Ministarstvo je bilo u situaciji da u nekoliko prilika daje svoje mišljenje o tome. Međutim, moram da kažem da je ono, prije svega, ovo pitanje, u nadležnosti Ministarstva pravde i jedne i druge zemlje. Ministarstvo za ljudska prava i izbjeglice, u ovom 18 slučaju, može da interveniše jedino u slučaju ukoliko se radi o torturi nad onim protiv koga se vodi ovaj postupak. Mi smo izrazili javno i dopisom nadležnim institucijama našu zabrinutost zbog lošeg zdravlja gospodina Jurišića i potrebu da se on oslobodi, sa slobode vodi dakle ovaj proces. Imamo mi odjel, dakle, Sektor za ljudska prava i izbjeglice koji prije svega ... prati ovo pitanje i bilo koja procedura ukoliko se želi ići dalje u zahtjev, apeliranje, u pogledu statusa gospodina Jurišića, mimo ovih uobičajenih nadležnosti Ministarstva pravde i jedne i druge zemlje – da to mora doći na zahtjev ili gospodina Jurišića ili članova njegove porodice. Takve su te procedure i Ministarstvo će u svim tim – advokata itd. – i Ministarstvo će u svim tim situacijama uraditi sve ono što od njega bude bilo traženo.

Hvala.